

CONVIVENZA

Nagut da nov sut il sulegl

PIEDER CAMINADA

As regurdaivs Vus anc da la Partida dals automobilists? La Partida dals automobilists era ils onns otganta e novanta bain ina partida, da la quala ins stueva temair ch'ella provochechia in incendi da surfatscha politic en Svizra. Ma lura è il fiu sa stizzà uschè spert sco ch'el è s'envidà. Ed en il fratemp è daditg puspè creschì pastg sur la terra brischada da lez temp.

La Partida dals automobilists, fundada l'onn 1985 da commembers malcontentes da la PLD e da la PPS, era ina grupp separata burgaisa ultradretga che enconuscheva be in tema: l'auto. Ed uschia na cumbatteva ella betg mo per dapli autostradas, ma bain na laschava gnanc in bun pail vi da l'obligaziun da metter si la tschinta da segirezza. Era en mes cunturn social na devi betg paucs concarstgauns – avant dal tuttafatg apolitics – che demonstravan tuttenina premuradamain cunter il stadi «totalitar» cun tatgaders e gluvas da protest. Instigads da provocaturs politics consideravan els per exempel l'obligaziun da metter si la tschinta da segirezza – notabene per lur atgna protecziun – sco restricziun da lur libertad individuala.

Cura che la muria dal guaud è vegnida adina pli evidenta a partir da la mesadad dals onns otganta e cura che carstgauns preoc-



cupads han pretendi da reducir las substanzas nuschaivlas dal traffic motorisà, ha la Partida dals automobilists midà il tun a moda anc oz irritanta. Il punct il pli bass da las tiradas d'odi e stà in'attatga verbala da Michael E. Dreher. Il fundatur da la Partida dals automobilists è sa permiss la frasa barbarica ch'ins duaja «enguttar ils sanesters ed ils verds vi da la paraid ed ir suravia cun in bittaflommas». Deplorablmain han las posiziuns extremas da la Partida dals automobilists perfin gi effect. Tar las eleziuns dal Cussegl naziunal l'onn 1991 ha la partida ultradretga acquistà ina quota d'electurs da passa tschintg pertschient – avant ch'ella è spert puspè svanida.

Las parallelas tranter la Partida dals automobilists da lez temp ed ils opponents extremes da las measiras cunter il coronavirus dad oz èn nunsurvesaivlas. Er als ultims vai adina be per lur libertad individuala che vegn presuntivmain surpassada dal stadi. E cun-

ter quai sa defendan quellas persunas «privadas da lur dretgs» senza cumpromiss e perfin cun smanatschar massivamain magistrats, collavuraturas e collavuratur da medias e persunas cun in auter punct da vista – era sche la maioritad da la populaziun sto patir da questa mancanza da resguard. Bainstar general? Gnanca da pensar!

Ma bain, tge pon ins far cunter quai? Ins po natiralmain vegnir melen e verd da la gritta, tge che blers fan era. Ubain ch'ins surpiglia en vista a la pandemia che sa derasa la responsabladad persunala, resta precaut e sa consolescha ch'ils uschenumnads «amis da la Constituziun» e lur simpatisans subeschan il medem destin sco la Partida dals automobilists. Ins na vegn gia prest betg pli a sa regurdar dad els.

Quai è il curs dal temp, da vegl ennà. Tgi che na vul betg crair, po puspè ina giada leger il cudesch dal Vegl Testament «Kohelet», nua ch'il predicatur Salomo di: «I na dat nagut da nov sut il sulegl.» Mintgant di era la Bibla la vardad.

Pieder Caminada è mainaproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en il vitg rumantsch da Castrisch.

La convivenza da las culturas e da las linguas en il Grischun – quai è il tema da la rubrica «convivenza». Ella cumpara mintga glindesdi en las gasettas La Quotidiana e Südostschweiz.